

QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum die foris
decima quinta Novembris.

M. CLAUDIO QUARTIER, Doctore Medico,
Præside.

An in quavis hæmorrhagiâ admovenda naribus astringentia?

I.

SANGUIS, in quo triste jacet hoc vivere nostrum, ex quatuor naturis constat, quæ quatuor elementis proportionem respondent: hunc, licet indolis adeo diversæ, unus tamen calor producit, quatenus idem calor est princeps naturæ & animæ instrumentum. Quandiu autem sanguis non exuberat & servat integritatem, tandiu functiones omnes naturales vigent & bellè obeuntur, & ab eo universa penè vitæ commoda prodeunt, ut quo tanquam rore benefico intus corpus perfunditur, quem ut salutare pabulum innumeris particulis affluens, partes magna varietate distinctæ prolectant, eoque gaudent quod sibi familiarius est & magis amicum, sicut stirpes prope infinitæ omnis generis succum, quem naturaliter tellus possidet, sugunt & in sui substantiam commutant. Quoniam vero jecur absque consilio sanguinem conficit, ejusque redundantia nusquam non naturam molestat, quæ tum suis ipsa virtutibus oneratur, suspecta debet habere sua bona quicunque sanguinem aut uberiorem aut ab insito tenore descendentem in se continet. Et ut natura sibi soli relicta in morbis melancholicis excretionem succi feculenti per hæmorrhoidum vias provocat; sic in *πολυαιμία* seu nimia sanguinis ubertate, illiusque everſa temperie, liberalem per nares hæmorrhagiam ciet, quæ etiam aliquando eâ invitâ licet & repugnante cietur: utramque qui suppressere tentat astringentium usu, quæ naribus curat ad moveri, graviter peccat in rem ægro-

tantum, cum ex coactis in angustum sanguinis & spirituum æstuantium copiis, difficillimorum fiat affectuum concursus atque impetus, quos funesta ut plurimum symptomata consequuntur.

I I.

A'ΙΜΟΡΡΑΓΙΑ κατ' ἐξοχήν sonat pro fluxu sanguinis ex iis quæ ad nasi radicem excurrunt vasorum ostiolis: hæc uni homini familiaris est, ut qui sit *μεγάλος πλῆχρος*, & erectam figuram sanguinemque spiritibus divitem habeat. Fluoris illius multiplex esse ratio dicitur, pro cuius distinctione tum naturaliter tum criticè tum præter naturam accidit: naturalis cadit in Ephebos; dum venter capaces vocem incipiunt asperiores reddere, & identidem per superas eas partes sanguinem excernunt: critica febres ardentes perfecte judicat, cuius beneficio planè confanescunt quæ videbantur lethales, comparatâ scilicet meatuum libertate, hacque datâ viâ vitiosæ materiæ, cuius molestiâ enixè natura studet sese expedire: quæ demùm vi morbi symptomatice dicitur, sæpè summum naturæ impedimentum includit, unaque est effusa & effrenata, quæ modestiæ fines translientem humorem arguit, nullâ agrorum levatione, seu potius novâ calamitatum accessione; altera levior est, quæ frequenter denotat irritum naturæ conatum, hæc enim præ sui infirmitate agit, non peragit, incæpat quod non potest perficere, undè substillum illud è naribus sæpissimè symptoma terrificum, malique omnis existimatur, atque omnino damnatur, ut morbi malignitatis ac virium imbecillitatis firmissimum argumentum.

I I I.

QUEMADMODUM non mirum est disrumpi dolia, quoties nimis implentur, & mustum spiritibus turgidum in iis fervet; sic in sanis & adolescentibus, ubi rubet corpus, plenæque venæ tument, non insolens referatis narium vasis sanguinem proflire, quem vix capiunt cum in iis redundat, aut immo dicè cælet & effervesceat, in inflammationibus internis aliisque morbis gravissimis multâ & efferrâ bile commixtus, aut demum motu morbi vel viscerum ἀτονίᾳ naturæ legibus & imperio refractarius & cedere nescius, quâ datâ portâ ruit; hinc videre est vires corrumpi, undè fulturam sibi parare solent; sic sanguis jactatus, agitato, fusus, tenuior magisque biliosus & fluidus evadit, totusque mutatus ab ipso, ad caput rapitur, huiusque fluoris author est, quem sæpè ob illius præsentiam è partibus inferioribus

3

ad superiores translati suffusa rubore facies denuntiat, ex eodem humore partes exquisitissimi sensus divellente dolor capitis maxime circa frontem & tempora prægrandis declarat, necnon venarum repletio & compressio, arteriarum pulsatio, ut & narium titillatio ex sanguine fervidiori & subtiliori per hæc loca sibi viam quaerente significare adsolent, quæ symptomata crebro præcedit atque comitatur distentio hippochondrii dextri, in quo hepar thesaurus humoris gratiosi, αἷματώσεως officina, φλεβὸν πύλωμα suam habet stationem.

I V.

ASTRINGENTIA, quæ Græcis στυπτικά, qualiâ vulgo perhibentur plantago, poma mandragoræ; sumach, alumen; radix nigellæ, lapis hæmatites, & pleraque alia, non sunt unius generis & ingenii, nec omnium est una vis æqualis; quædam frigida qua pollent virtute, alia crassâ & terrenâ substantiâ, qualis in acerbo, austeroque sapore deprehenditur, hæc ex naturâ suâ involuta innatâ vi suos effectus exerunt: Eorum omnium facultas se prodit, dum meatus contrahunt, angustant, occludunt, humoris influxum in partem aliquam prohibent & intrò remeare cogunt, sicque incensæ partis molestus ardor videtur aliquandò sedari, dolor durus deliniri, abscessus arceri, verum id insidiosè, minusque fausto ut plurimum eventu contingere solet; cum humor iste depravatus, quem bilis æstus concitat, benè penitus in interiores partes refluens, strages edat acerbiores, vixque præterea sit ullum morbi genus, qui sanguinis exuperantiam aut ejusdem vitiositatem pro parente non agnoscat, qui ut exhauriatur & ad caloris modum revocetur, tum vacationem, tum purgationem postulat, in hoc salutem positam putes, adeo ut nomen incurrat ἀμεΐδου, & errantis totâ viâ, qui spretis hisce præcipuis adjumentis, in bubonibus, parotidibus, variolis, erysipelatis, & aliis consimilibus, humores incandescentes & ad superficiem corporis irruentes, astringentibus admotis regerere nititur, quos potius illicere atque vi rapere, si tardius ferrentur, conducirer.

V.

OBSTUPET hianti ore elementis Medicinæ vixdum imbutus, cum sanguinem è narium vasis erumpentem videt: pro vulgi more hunc ilicò sistendum esse pronuntiat; & in hunc usum quasi novo quodam aucupio, famosum stypticum naribus adhibendum, in quo post habitis cæteris præsidii omnia putat

esse collocanda, parum sollicitus, an natura sit author illius excretionis, an vi & malitiâ morbi proritetur: apud illum novum est sanguinem hunc efferum & catulientem temerè suppressum, modo in viscera irrumpere, modo convulsionem, apoplexiam, aliosque perniciosos affectus parere, qui frequenter ægris commoriantur, sicut intempestivè facta hæmorrhoidum suppressio, hydropem tabem & aliud quid calamitosum secum importat, quæ convenienter fluentes omnia ferè declinant mala, cerebri, thoracis, hepatis, lienis, atque adeo corporis universi. Salutaris disciplina longè aliam præscribit rationem aquis legibus nutritam hæmorrhagiæ curandæ, à quibus discedere piaculum est: quæ naturæ conatum sequitur, ἀπαίδευτος τὰ δόγματα ποιέουσι, omnino sinendam esse decernit, hancque acceptam ferendam ejusdem providentiæ, quæ per cognitæ sibi vias sanguini superfluo nec non sibi gravi & morborum plurimorum fomiti copiam facit exeundi: quæ præter naturam est, docet sensim coercendam cordis & hepatis fervore temperando per idoneam victus legem, frictionibus brachiorum & tibiarum, cucurbitulis affixis scapulis & summæ cervici, cæterisque armaturæ quidem levioris auxiliis, verum tanquam palmario præsidio, venæ sectione quantum vires ferent in locis commodis celebrata & multoties repetita, cujus ope præsentissimâ effrenis hujus & commoti succi per nares profuentis motus intercipitur, reprimitur impetus, & alio dato itinere prorsus compescitur, sicque non perversâ curatione, sed multò utiliùs, perfectiùs securiùs prædictâ viâ & ratione plurimum arti consentaneâ hæmorrhagiæ medeberis.

Non ergo in quavis hæmorrhagiâ admovenda naribus astringentia.

DOMINI DOCTORES DISPUTATURI.

M. Nicolaus Pelletier.

M. Nicolaus de Jouvanci.

M. Guillelmus Petis, Serenissimæ
Delphini Medicus primarius.

M. Renatus le Comte.

M. Germanus Preaux.

M. Rolandus Merlet.

M. Franciscus Afforty.

M. Petrus Daquin, Medicus
Regis perpetuò ordinarius.

M. Claudius Perraut.

Proponebat Lutetiæ FRANCISCUS GOUEL, Parisinus
Baccalaureus Medicus. A. R. S. H. 1685.

Apud Franciscum Muguet, Regis & Facultatis Medicinæ Typographum.